

Whulh Nat Dustl'us John Yuk'e'ánguz

Dahooja nuhwhudúsnì, ni John

¹Si dune netsuh whedelhdzulh, ts'eke 'utahálti 'ink'ez buzkeh chah hubuts'un k'e'usges. 'En hubuk'esi'. 'Aw si zeh ilah. Ndunnah khunek 'alhä 'int'ah, 'i t'eninzun, 'en chah hubuk'ehintsi'. ²Ndi khunek 'alhä 'int'ah neyúdezdlä, 'i 'ink'ez 'ilhuz wheni nelh utét'ilh, 'i bugha 'udusni. ³Yak'usda ne'aBá 'ink'ez neMoodihti Sizi Gri ne'aBá buYe', 'en buts'un ye unzoo, 'i ye negha té'ninzun, 'i chah, 'ink'ez nedzi whudezghel, 'i ts'iyawh 'ilhuz wheni nelh 'óot'e. Khunek 'alhä 'int'ah, 'i 'ink'ez be lhk'ets'udutsi', 'i bulh.

Ne'aBá khunek netl'aída'ai, 'i lhk'ets'oodutsi', ni

⁴Ne'aBá khunek netl'aída'ai, 'i ts'ilhchoot k'una'a, whuz na'a bulunah nyuzkeh khunek 'alhä 'int'ah, 'i bulh hédulh. 'Et nahoo'ai hoh tube hoonúst'i. ⁵Ink'ez ts'eke nts'un tédusdlih. 'Aw ndi k'an 'i khunek 'i 'et netl'aóoda'ai ilah 'udusni. Ndi khunek 'i soo 'udechoo da 'i njan lhk'ets'oodutsi', ni. ⁶Ndai khunek netl'aída'ai bugha nuts'óodelh huba' hoont'ah. Ndi 'i bé lhk'ets'udutsi', 'i 'int'ah. Soo 'udechoo da dahts'o ndi khunek netl'aída'ai, 'i bughá nóhdelh huba' hoont'ah.

Lhanah dune nana'ah 'en yun k'éhindel, 'et huwa kháhdli

⁷Lhanah dune nana'ah 'en yun k'éhindel. 'Et huwa ndunt'ah 'aw Sizi Gri ndi yun k'ut buyust'e be nuséya chahudusnih. Ndan ndunt'ah, 'en dune nana'ah 'int'ah 'ink'ez Christ ch'a hudetni chah 'int'ah. ⁸Nuhwhenich'oh khahdli! Ndai 'ut'en be néts'ust'en, 'i tinta ts'ooelhl whuch'a. 'Et sih soo cho neba 'uk'elha hóle. ⁹Ndan tinta 'ut'ih 'ink'ez Christ khunek be bughu yatuk, 'i 'aw chayóotun t'eh, 'aw Yak'usda chah chaít'ih. Ndan ndi Christ bughu yatuk, 'i yoontun t'eh, ne'aBá buYe' bulh nahúlt'ah hubit'i ho' 'int'ah. ¹⁰Ndan Christ khunek be bughu yatuk, 'i chayóotun hoh whenhodutéhl'eh huba nuhghu ninya t'eh, ndunt'ah 'aw nuhkoo daóoya gunih, k'us danínyih dóohtni gunih! ¹¹Ndan danínyih yúlhni, 'en chah ndi tink'us ne'út'en yula 'ut'en ho' 'int'ah 'et huwa.

John 'ubulhni, “Ihudzin t'eh nuhts'un tésyalh hukwa' nuszun”

¹²Njan whulat nuhwhuts'un k'etésgus. 'Aw dustl'us too bulh k'une'úsduguz, 'i 'udutésni hukwa cha'nuzúszun. 'Ants'i nuhwhuts'un tésyalh 'ink'ez soo nuhwhunen ts'un nuhwhulh yatelhtuk 'et hukwa' nuszun. 'Et huwa tube cho ts'uhót'i. ¹³“Nuhwhulhtus 'utahálti buzki, 'en dahooja nuhwhuhútni. 'Et ndoh honeh.